

A Xunta de Goberno desta Deputación Provincial na súa sesión ordinaria do día 19 de decembro de 2025, adoptou, entre outros, o seguinte acordo:

22.35898.- ENCARGO Á EMPRESA TRAGSATEC, S.A. S.M.E. M.P., COMO MEDIO PROPIO DA DEPUTACIÓN PROVINCIAL DE PONTEVEDRA, DA XESTIÓN DO SERVIZO DE RECOLLIDA DE ANIMAIS ABANDONADOS NA PROVINCIA DE PONTEVEDRA E DO CENTRO DE ACOLLIDA E PROTECCIÓN DE ANIMAIS DE ARMENTEIRA (PERÍODO 2026-2027). (EXPTE. 2025077570)

Visto o informe-proposta do Xefe do Servizo de Asistencia Intermunicipal, de data 28 de novembro do 2025, que conta co conforme do Secretario Xeral, co seguinte teor literal:

“O técnico que subscribe, no exercicio das competencias que ten asignadas e de acordo co disposto no artigo 80 da Lei 39/2015, de 1 de outubro, do procedemento administrativo común das administracións públicas, emite o seguinte

INFORME-PROPOSTA

ANTECEDENTES DE FEITO E TRATAMENTO TÉCNICO

Primeiro. A Xunta de Goberno da Deputación Provincial de Pontevedra, na sesión celebrada o 22 de decembro de 2023 (acordo nº 26.33314), encargou á empresa Tragsatec S.A. S.M.E. M.P, como medio propio da Deputación de Pontevedra, a xestión do servizo de recollida de animais abandonados na provincia de Pontevedra e do centro de acollida de protección de animais de Armenteira (CAAN), con efectos 1 de xaneiro de 2024 ata o 31 de decembro de 2025, por un importe de 712.504,81 euros.

Dito encargo modificouse posteriormente por acordos da Xunta de Goberno nº 19.34034, de data 12 de xullo de 2014, e nº 10.34542, de data 17 de xaneiro de 2025, co fin de colaborar cos Concellos na xestión dos programas sanitarios e de capturas e esterilización dos gatos pertencentes ás colonias felinas, aumentando o importe do encargo a 1.034.421,32 euros durante o ano 2025.

Segundo. Próximo a expirar o período de vixencia do citado encargo á empresa Tragsatec S.A. S.M.E. M.P, a Deputación de Pontevedra considera necesario dar continuidade ao mesmo co fin de manter no ÁMBITO PÚBLICO a prestación dun servizo que afecta ao INTERESE XERAL e a aspectos esenciais de sanidade, orde pública, benestar dos animais e medio ambiente e que detallamos a continuación:

a) A través deste encargo a un medio propio como TRAGSATEC a Deputación de Pontevedra seguirá a prestar este servizo a 52 concellos da provincia, cunha poboación conxunta de 424.287 habitantes, que delegaron na Institución Provincial esta competencia propia; nos anos que leva en funcionamento este servizo o centro realizou máis de 20.000 intervencións e actualmente atende unha media de 250-300 animais nas instalacións de Armenteira.

Deixar de prestar o servizo nestes momentos causaría un GRAVE PREXUIZO aos concellos que carecen dos medios necesarios para iso, tendo en conta, ademais, que tanto a Lei 4/2017, de 3 de outubro, de Protección e Benestar dos animais de compañía en Galicia (DOGA nº 194, de 11 de outubro de 2017) coma a Lei 7/2023, de 28 de marzo, de protección dos dereitos e do benestar dos animais (BOE nº 75, de 29 de marzo de 2023), obríganlles a dispor dun centro autorizado do que carecen na actualidade.



Neste sentido resaltar que a Deputación de Pontevedra é a actual titular do centro público de acollida de animais abandonados da Armenteira, autorizado pola Xunta de Galicia e que figura inscrito co número 36/028/0005/CR no Rexistro Galego de Núcleos Zoolóxicos.

Ademais, produciríase unha situación moi grave para a SALUBRIDADE PÚBLICA xa que os animais que agora mesmo están no Centro de acollida deixarían de ser asistidos, incorrendo-tanto a Deputación como os Concellos- nunha grave negligencia.

Por iso, a continuidade do servizo mancomunado de recollida de animais constitúe unha prioridade para a Deputación de Pontevedra e os numerosos Concellos adheridos ao mesmo que viron solucionado un grave problema de salubridade pública e seguridade viaria.

A satisfacción é a nota predominante na prestación dun servizo que non lles ocasiona ningún problema e é atendido coa máxima celeridade ante calquera petición que xurda.

b) A entrada en vigor da Lei 4/2017, do 3 de outubro, de Protección e Benestar dos Animais de Compañía de Galicia, veu a supoñer unha modificación significativa de certas actuacións desenvolvidas polo CAAN. Entre as medidas máis destacables, pola súa magnitude e significación técnica, atopamos a obrigatoriedade de esterilizar a todos os animais entregados en adopción e a prohibición xenérica do sacrificio de animais nos centros de recollida, coas excepcións legalmente establecidas.

Estas novidades fixeron necesario un gran esforzo por parte de Deputación de Pontevedra para conseguir que o centro de acollida garantira estes novos requirimentos, tanto dende o punto de vista estrutural como da prestación de servizos.

Igualmente, compre destacar tamén o esforzo realizado dende o punto de vista da prevención do abandono tanto dende a Deputación de Pontevedra como dende o Centro de Acollida, deseñando e executando campañas de concienciación e actuacións de colaboración con outras entidades e autoridades implicadas na protección animal.

Todas estas medidas e actuacións están a ter unha repercusión directa sobre a xestión e os obxectivos do centro, que ven a consolidar uns resultados excelentes nos valores de recuperación e adopción dos animais abandonados recollidos na rúa, acadando unhas taxas de adopción que duplican os valores acadados nos anos 2013 e 2014, con máis de 600 animais adoptados ao ano. Deste modo, o centro de acollida está a mudar o modelo de xestión, baseado na recollida e mantemento dun gran número de animais, por un modelo sostible de recollida e entrega en adopción.

Pois ben, para levar a cabo ditas políticas consideramos que a empresa pública Tragsatec dispón dos recursos adecuados para planificar e xestionar o servizo de acollida de animais garantindo os seus dereitos, grazas ao seu potencial de resposta e ao seu gran equipo técnico. As características incluídas no encargo adaptaranse ás necesidades futuras do servizo que ten como premisa fundamental garantir o benestar dos animais recollidos.

c) A entrada en vigor da Lei 7/2023, de 28 de marzo, de protección dos dereitos e do benestar dos animais supuxo un aumento das competencias dos concellos nesta materia. Entre as novas obrigas destacan a prestación dun servizo de urxencia para a recollida e atención veterinaria dos animais abandonados dispoñible 24 horas ao día, a identificación e rexistro de todos os animais que sexan recollidos sen identificación e a obriga de xestión das colonias felinas.

No que respecta á obriga para a prestación dun servizo de urxencia para a recollida e atención veterinaria, a propia norma apunta á posibilidade de delegar aquela nas deputacións provinciais; non obstante, o modelo actual de prestación do servizo no CAAN xa está aliñado coa obriga de prestación dun servizo de urxencia para a recollida e atención veterinaria, dispoñible 24 horas.



Sen embargo, a necesidade de identificación e rexistro de todos os animais que son recollidos sen identificación si que supón un gran impacto sobre os centros de protección animal galegos, tendo en conta a que a norma autonómica non contempla a identificación no momento da entrada dos animais e só previa esta obriga para aqueles animais que saían do centro; na práctica esta obriga implica un dobre trámite de rexistro para aqueles animais que posteriormente son adoptados, o cal implicará un incremento medio duns 20 a 25 euros por animal recollido polo CAAN.

Por outra banda, a Lei 7/2023 tamén veu a impoñer a xestión obrigatoria das colonias felinas, que ata o momento tiña carácter voluntario, establecendo no seu artigo 39.3 a obriga de colaboración por parte das Deputacións na prestación deste servizo.

Esta nova circunstancia, obrigou a modificar o encargo formalizado con TRAGSTATEC no seu día contemplando as seguintes actuacións:

- a) O mapeo e censo dos gatos do termo municipal, coa colaboración do concello, para unha planificación e control nas esterilizacións acorde ao volume de poboación que se desexa controlar para que resulte eficiente e impida o aumento do número de gatos.*
- b) Execución do programa de capturas, esterilización e devolución dos animais pertencentes á colonias felinas.*
- c) Programa sanitario da colonia, subscrito e supervisado por un profesional veterinario Colexiado, realizando a desparasitación, comprobación sanitaria, vacinación e identificación de cadaquén dos animais capturados.*

Dende a posta en marcha do servizo a mediados do ano 2024, máis de 40 Concellos fixeron uso deste servizo, sendo os datos en resumo os seguintes:

2024	621	538	538	477	458
2025	702	603	603	429	372
TOTAL	1323	1141	1141	906	830

Así mesmo, co obxecto de establecer un servizo equitativo para todos os concellos adheridos ao servizo, se estableceron os seguintes criterios:

-Prestación do servizo restrinxida aos concellos adheridos ao CAAN (cunha poboación inferior aos 50.000 habitantes), e de acordo ao establecido no procedemento relativo á “esterilización de gatos comunitarios recollidos en colonias felinas legalmente establecidas”, publicado na sede electrónica provincial.

-Establecer unha limitación de animais obxecto de esterilización baseada en criterios de poboación, ao considerarse que o número de individuos presentes nas colonias está directamente relacionado coa poboación humana circundante. Neste sentido, estableceuse o límite anual de 1 animal cada 200 habitantes nos seguintes tramos, ata acumular o máximo de animais recollidos no orzamento total e sen prexuízo da posibilidade de flexibilizar eses parámetros se hai concellos que non fan uso do servizo e/ou esgotan a súa cota.



**Tramos por poboación Número máximo de animais a
esterilizar por ano**

Menos de 5.000 habitantes	25
Entre 5.001 e 10.000 habitantes	50
Entre 10.001 e 20.000 habitantes	100
Entre 20.001 e 40.000 habitantes	200
Más de 40.001 habitantes	250

d) A prestación do servizo a través desta empresa pública resulta vantaxosa con respecto a unha licitación por garantir, en maior medida, a súa continuidade sen interrupción e nas condicións desexadas. Pola súa banda, a definición e adxudicación do contrato resulta complexa debido, entre outros factores, a que non existen precedentes neste tipo de servizos na Deputación e á carencia, por parte dos Concellos integrantes, do persoal propio especializado na materia, concretamente veterinarios/as.

A maiores do anterior, nestes momentos un cambio na política de xestión do centro nin sería oportuna nin conveniente desde o punto de vista social, xa que grazas á actividade desenvolvida estes anos cambiouse a percepción que parte das Asociacións Protectoras de Animais tiñan respecto deste centro, e do que agora ninguén dubida do seu labor como centro de acollida e refuxio de animais.

e) Coa xestión de Tragsatec mellorouse substancialmente a calidade na prestación do servizo (respecto da que realizan algúns Concellos), grazas ao seu gran potencial de resposta e a un equipo veterinario formado e cualificado. Durante todos estes anos de traballo esta empresa pública foi garante da prestación, de acordo coa legalidade, dun servizo xa de seu moi complexo debido á sensibilidade dunha parte da sociedade co posible destino dos animais.

Fíxose especial fincapé no fomento das adopcións dos animais, gratuíta para os particulares cando o prezo normal dunha adopción non baixa dos 60-80 euros (animal vacinado, desparasitado, con microchip etc...), co obxectivo de garantir esas políticas de benestar, superando as 6.000 adopcións.

Neste sentido é de destacar que tanto a Lei de Protección e Benestar dos animais de compañía en Galicia coma a Lei de Protección dos Dereitos e do Benestar dos animais estatal establecen que todos os animais que saian en adopción teñeno que facer esterilizados, obriga que levará un gran esforzo de medios que a empresa Tragsatec está en condicións de cumprir.

Tamén é importante subliñar que actualmente a normativa estatal prevé coma obrigatoria a prestación do servizo as 24 horas do día, durante os 365 días do ano, o que implica dispor de persoal suficiente en todo momento para garantir a súa correcta prestación e que dificilmente unha empresa privada podería garantir.

f) A empresa Tragsatec está a colaborar activamente coas distintas autoridades administrativas e xudiciais na incautación e retirada de animais no marco de actuacións de vixilancia e control sobre o benestar animal, colaboración que se deixaría de prestar no suposto de non encargar o servizo á unha empresa pública, co consecuente prexuízo para o interese xeral; tamén se tramitan numerosas denuncias por malos tratos animais e se colabora co SEPRONA na persecución de posibles delitos.

NOVA PROPOSTA ECONÓMICA

Xustificada a necesidade de encargar novamente a xestión do CAAN á empresa pública Tragsatec, como medio propio da Deputación de Pontevedra, os servizos desenvolvidos a través deste encargo aparecen detallados no prego de prescricións técnicas que acompaña a este informe e que, a modo de resumo, son os seguintes:





- *Servizo de recollida de animais abandonados e/ou vagabundos, durante os 365 días do ano e 24 horas diarias.*
- *Servizo de recollida de animais con propietario que, por causas debidamente xustificadas, non poden ser atendidos polos mesmos: tramitación das solicitudes, resolución e notificación das mesmas.*
- *Localización de propietarios no lugar da recollida do can e, no seu defecto, dende o centro de recollida realizando as notificacións necesarias para o cumprimento da normativa.*
- *Colaboración con diferentes autoridades competentes no comiso e retirada de cans, no marco das actuacións de vixilancia e control sobre o benestar dos animais domésticos.*
- *Xestión da entrega de animais aos seus propietarios no centro de recollida (incluída a recadación de taxas).*
- *Mantemento e coidado dos animais recollidos no centro.*
- *Limpeza e desinfección das instalacións do centro de recollida.*
- *Identificación de animais recollidos non identificados e/ou adoptados, previo á súa saída do centro.*
- *Revisión e tratamento sanitario de animais abandonados nas primeiras 24 horas dende a súa entrada.*
- *Asistencia veterinaria sobre os animais acollidos no centro.*
- *Esterilizacións de todos os animais entregados en adopción.*
- *Atención ao público presencial, telefonicamente e telematicamente.*
- *Xestión de adopcións e cesións de animais declarados abandonados a particulares. Os animais adoptados son entregados desparasitados, vacinados, identificados e inscritos no rexistro de animais de compañía de Galicia.*
- *Colaboración no deseño e desenvolvemento de campañas de adopción.*
- *Formación e asesoramento de técnicos e autoridades municipais, para o exercicio de competencias, especialmente no referente ao desenvolvemento da normativa local, os controis, a vixilancia e a argumentación dos expedientes administrativos.*
- *Inicio e seguimento de expedientes administrativos de protección animal (fundamentalmente abandono) e en materia de animais potencialmente perigosos.*
- *Realización de estudos e informes solicitados por diferentes concellos sobre as actuacións realizadas e sobre a valoración das condicións de mantemento de diferentes animais.*
- *Colaboracións en investigación, saúde e benestar animal: estudo nacional sobre a prevalencia de enfermidades infecciosas máis importantes, sobre os indicadores de benestar animal (AVEM) e sobre as taxas de adopción (Fundación AFFINITY).*
- *Execución do programa de captura, esterilización e devolución de gatos procedentes das colonias felinas dos concellos da provincia de Pontevedra, con menos de 20.000 habitantes, que contén cun sistema de xestión de colonias felinas.*



- Programa sanitario da colonia, subscrito e supervisado por un profesional veterinario colexiado, realizando a desparasitación, comprobación sanitaria, vacinación e identificación de cadaquén dos animais capturados.
- O mapeo e censo dos gatos do termo municipal, coa colaboración do concello, para unha planificación e control nas esterilizacións acorde ao volume de poboación que se desexa controlar para que resulte eficiente e impida o aumento do número de gatos.

A proposta económica derivada deste novo encargo ascende a 1.115.336,21 euros, de acordo ao seguinte detalle resumido:

Annualidade 2026

1. Coordinación	67.962,64 €
2. Servizo de recollida de animais	235.579,81 €
3. Servizo de atención do centro de recollida	151.204,25 €
4. Servizo de atención veterinaria centro de recollida	355.386,93 €
5. Servizo de aplicación programa sanitario colonias felinas	201.556,42 €
6. Aluguer e consumos	12.403,00 €

CUSTES DIRECTOS TOTAIS	1.024.093,05€
4.15 % Custes Indirectos	42.499,86 €
4.57 % Gastos Xerais	48.743,30 €
Total Orzamento de Execución Material	1.115.336,21€
Total Orzamento de Execución por Administración	1.115.336,21€

A anualidade do 2027 ten o mesmo alcance e importe.

Este orzamento non se verá modificado pola anexión de novos concellos ao servizo, agás aqueles que superen os 50.000 habitantes ou pertenczan a outra provincia.

A proposta económica que aparece detallada na documentación adxunta, axústase á calidade do servizo solicitado en base aos seguintes argumentos:

a) O número de actuacións desenvolvidas polo CAAN mantense en constante crecemento. O centro ven a atender cada ano un número maior de avisos de localización de animais pola vía pública, que deben de ser recollidos para a súa atención. Durante os anos 2024 e 2025 chegaronse a atender case 4.00 solicitudes de servizo, entre as que se inclúen as correspondentes con cans abandonados, que non son reclamados polos seus propietarios, e aqueles cans perdidos ou extraviados, que son reclamados e recollidos polos seus donos.



Non obstante, compre indicar que o número de abandonos mantense en valores moi elevados, chegando aos case 3 cans abandonados por cada 1.000 habitantes, retornando así a valores de abandonos similares aos do ano 2019, cun comportamento similar ao do resto do estado, segundo os datos publicados pola Fundación Affinity. Pois ben, o elevado número de intervencións realizadas polo CAAN conlevoa a un novo reforzo do persoal adscrito ó servizo. Neste sentido resaltar que só unha empresa pública como Tragsatec sería quen de garantir o correcto desenvolvemento das tarefas previstas inicialmente durante estes anos.

b) Tamén é importante subliñar que o servizo se presta os 365 días do ano, as 24 horas, sábados, domingos e festivos, e que para a súa prestación correcta, tendo en conta o número crecente de avisos de servizo, os animais presentes no centro, o volume de adopcións e a xestión do programa de colonias felinas, é necesario contar cun equipo formado por 1 coordinador, 5 veterinarios, 2 auxiliares administrativos, 2 auxiliares en clínica, así como 7 operarios-laceros, cuns elevados custos no capítulo de persoal.

c) As tarifas de persoal aprobadas grupo Tragsa aumentaron un 6% de media nestes dous anos, así coma os custes correspondentes con materiais e consumibles non suxeitos a tarifa, coma é o caso dos relativos á alimentación dos animais (superior ao 40% segundo informa o Ministerio de Agricultura, Pesca e Alimentación). Compre destacar que a prestación deste servizo por parte da empresa pública TRAGSATEC fixo posible que se mantivera o mesmo, de xeito ininterrompido, sen que isto repercutise na calidade do servizo.

d) A proposta económica de TRAGSATEC é moi competitiva, permite unha optimización dos recursos públicos, unha mellora da calidade na prestación do servizo e un importante aforro respecto a unha posible concesión do servizo a unha empresa privada.

Proba do dito é o estudo económico-financeiro elaborado polos técnicos do Servizo de Cooperación que se adxunta ao presente informe no que se fixa un prezo de 1.290.342,44 euros para prestar un servizo como este; neste punto lembrar que outra vantaxe respecto a unha licitación é que aos encargos realizados ao medio propio TRAGSA e a súa filial TRAGSATEC non se lle aplica o IVE (artigo 7.8°.c) da Lei do IVE), co aforro que isto supón para o adxudicador.

As tarifas vixentes actualmente veñen determinadas pola actualización automática das tarifas oficiais do GRUPO TRAGSA vixentes na actualidade (aprobadas mediante Resolución da Subsecretaría do Ministerio de Facenda e Administracións Públicas, BOE nº 103, do 29 de abril de 2025), segundo as unidades descritas no orzamento.

e) A entrada en vigor da Lei 7/2023, do 28 de marzo, de Protección dos Dereitos e do Benestar dos Animais, ven supoñer unha modificación significativa de certas actuacións desenvolvidas polo CAAN; entres as medidas máis destacables, pola súa magnitude e significación técnica, atopamos a obrigatoriedade de identificar e rexistrar a todos os animais que entran nos centros de recollida, en lugar de identificar unicamente aos que saíron en adopción, co incremento de custes que isto implica en conceptos de material, persoal e taxas administrativas, así como a xestión das colonias felinas, nos termos xa expostos.

f) Tamén seguen a ser de especial importancia as actividades do centro derivadas da execución das competencias municipais sobre o benestar animal, solicitándose numerosas actuacións de valoración, actuacións provisionais de comiso, informes e declaracións periciais e asesoramento en xeral sobre o benestar e protección animal. Así, estando estas actuacións e colaboracións recollidas de forma expresa e obrigada na normativa actual, faise necesario ter en conta este tipo de actividades para a determinación do orzamento tendo en conta a especialización, dedicación e precisión coa que deben de ser realizadas.

FINANCIAMENTO E DURACIÓN DO ENCARGO

O importe correspondente ao ano 2026, que ascende a 1.115.336,21 euros, afrontarase con cargo á aplicación 26/923.1705.227.07 do Orzamento Provincial dese ano, quedando supeditada a súa aprobación definitiva.



A cantidade correspondente ao ano 2027 (1.115.336,21 euros euros), queda condicionada á existencia de crédito adecuado e suficiente no Orzamento provincial dese ano.

Tendo en conta que os 52 concellos adheridos suman 424.287 habitantes e que a súa aportación na liquidación do ano 2025 foi de 169.714,80 euros (a razón de 0,40 euros/habitante), expomos a posibilidade de subir a cota dos concellos o próximo ano sempre que criterios de oportunidade e conveniencia así o aconsellen.

O encargo á empresa Tragsatec, como medio propio da Deputación Provincial de Pontevedra, establécese polo período comprendido entre o 1 de xaneiro de 2026 e o 31 de decembro de 2027, co fin de garantir a continuidade da actual política de xestión do centro (baseada nas adopcións e no benestar animal), a estabilidade, eficiencia e eficacia do servizo.

FORMALIZACIÓN DO ENCARGO

De acordo co disposto na disposición adicional vixésimo cuarta da Lei 9/2017, de 9 de novembro, de Contratos do Sector Público, Tragsa e a súa filial Tragsatec estarán obrigadas a realizar, con carácter exclusivo, os traballos que se lle encomenden de entre as materias relacionadas nos apartados 4 e 5 (entre outras, recollida e transporte de animais, actividade agrícola, gandeira e animal, administración e xestión de fincas, centros agrarios, medioambientais, de conservación da natureza, sanidade animal etc.); a súas relacións coa Deputación, da que son medios propios instrumentais e servizos técnicos, teñen natureza instrumental e non contractual, articulándose a través de encargos dos previstos no artigo 32 da Lei, polo que, a todos os efectos, son de carácter interno, dependente e subordinado.

A comunicación efectuada pola Deputación de Pontevedra encargando unha actuación a algunha das sociedades do grupo suporá a orde para inicial, sen prexuízo da observancia do disposto no artigo 32.6.b), debendo unicamente formalizarse en documento que será publicado no perfil do contratante da Deputación ao superar o encargo o importe de 50.000,00 euros (artigo 63.6 da Lei 9/2017).

CONCLUSIÓN

Á vista das razóns de eficacia, eficiencia e economía descritas con anterioridade, infórmase favorablemente o novo encargo á empresa Tragsatec S.A. S.M.E. M.P, como medio propio da Deputación de Pontevedra, da xestión do servizo de recollida de animais abandonados na provincia de Pontevedra e do centro de acollida de protección de animais de Armenteira (CAAN), durante o período 2026-2027, nos termos expostos.”

Visto o informe da Intervención Xeral, de data 10 de decembro de 2025, favorable á tramitación do presente expediente e no que se reflicte que a proposta económica deste novo encargo (1.115.336,21 euros) será imputable á aplicación orzamentaria 26/923.1705.227.07 na que, a data de hoxe, existe crédito no orzamento inicialmente aprobado para tal fin, quedando condicionada á aprobación definitiva do orzamento do ano 2026 por tratarse dunha tramitación anticipada, e á existencia de crédito adecuado e suficiente no mesmo.

Respecto do ano 2027, o importe ascende igualmente a 1.115.336,21 euros que se imputará á aplicación orzamentaria 27/923.1705.227.07, na que a existencia de crédito dispoñible quedará condicionada á aprobación de orzamento para dito exercicio.



Á vista do exposto, de conformidade co establecido no artigo 35 da Lei 7/1985, do 2 de abril, reguladora das bases de réxime local e en aplicación das bases aprobadas para a execución do orzamento, a Xunta de Goberno acorda por unanimidade:

Primeiro. Encargar á empresa Tragsatec S.A. S.M.E. M.P, como medio propio da Deputación de Pontevedra, a xestión do servizo de recollida de animais abandonados na provincia de Pontevedra e do centro de acollida de protección de animais de Armentería (CAAN), con efectos 1 de xaneiro de 2026 e ata o 31 de decembro de 2027, de conformidade co informe anteriormente transcrito, o prego de prescricións técnicas e o orzamento que figuran no expediente co CSV: PBSKR42K303WEMWX.

Segundo. Comunicar o presente encargo á empresa Tragsatec S.A. S.M.E.M. P aos efectos previstos na disposición adicional vixésimo cuarta da Lei 9/2017, do 9 de novembro, de contratos do sector público.

Terceiro. Publíquese o presente acordo no perfil do contratante da Deputación Provincial de Pontevedra ao superar o encargo o importe de 50.000,00 euros (artigo 63.6 da Lei 9/2017, do 9 de novembro, de contratos do sector público, en relación co preceptuado no artigo 32.6.b) do citado texto normativo).

O que lle comunico a Vde. para o seu coñecemento e efectos, coa salvidade que establece o art. 206 do RD 2568/86, de 28 de novembro.

Asinado dixitalmente na data que figura á marxe.

Contra este acordo que pon fin á vía administrativa poderá interpoñer recurso potestativo de reposición perante o mesmo órgano que o ditou, no prazo de un mes a partir do día seguinte ó desta notificación (*artigos 112 e 124 da Lei 39/2015, de 1 de outubro, de Procedemento Administrativo Común das Administracións Públicas*), ou ben, directamente recurso contencioso-administrativo perante o Xulgado do Contencioso-Administrativo de Pontevedra segundo o disposto no artigo 8 da Lei 29/1998, de 13 de xullo, Reguladora da Xurisdición Contencioso-Administrativa, e todo iso no prazo establecido no artigo 46 da citada Lei.

Todo iso sen prexuízo de que poida utilizar calquera outro recurso que estime conveniente.

